

Uunga siunnersuut: Nunat Aqqinik Aalajangiisartut pillugit Inatsisartut inatsisaat nr. xx, xx. xxx 2017-imeersoq

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Saqqummiussissut**Siullermeerneqarnera**

Naalakkersuisut sinnerlugit Nunat Aqqinik Aalajangiisartut pillugit Inatsisartut inatsisaattut siunnersuut matumuuna saqqummiuppara.

Kalaallit Nunaata nunat aqqi pisuussutigai, assigiinngitsutigut tamatsinnut pingaaruteqartut. Pingaartuuvoq nunat aqqi pillugit paasissutissanik katersinissarput nalunaarsuinissarpullu. Aamma pingaartuuvoq nunat aqqisa nutaat pisortatigoortumik akuerineqartarnissaat, suliamik ilisimasaqarluartunit pitsaasumillu nalilerneqareernermik kingorna, taamaalillutillu atuuttussatut akuerisaalerlutik. Taamaammat aamma pingaartuuvoq inatsisiliorneq ullutsinnut naapertuuttoq aqcutigalugu, nunat aqqisa qanoq katersornissaat, nalunaarsornissaat akuersissutiginiissaallu pillugit sinaakutissanik aalajangersaanissarput. Tamannalu inatsisissatut siunnersuutip matuma pingaarnertut siunertaraa.

Siunnersuummi malittarisassat maanna atuuttut annertuumik ingerlateqqinneqarlutillu erseqqissarneqarput. Taamaattoq aamma siunnersuummi allannguuteqarlunilu nutaartaqarpoq. Uani pingaarnertut erseqqissassavakka.

Nutaatut aalajangersarneqarpoq, nunat aqqinik aalajangiisartut nunat aqqisa akuerisaanissaannut tamanullu saqqummiunnissaannut tunngavissat aalajangersassagaat. Tunngavissanik aalajangersaanissap siunertaraa, suut tunngavigalugit atuuttussatut akuersissuteqarsimanerup tamanit takuneqarsinnaanissaa. Tamanna Nunap Aqqinik Aalajangiisartunut, nunat aqqinik ataasiakkaanik atuuttussatut akuersinissap isummerfiginiarnerani iluaqutaassaaq, aamma tamatumuunakkut tamat paasinerusinnaavaat, soq nunat aqqi ataasiakkaat taamatut atserneqartarnersut. Tamanut saqqummiussinissamik piumasaqaatip qularnaassavaa, tamat tunngavissatut aalajangersakkanik qaqugukkulluunniit paasiniaasinnaanerat.

Aammattaaq ataatsimiititaliap suliassaasa allattorneranni, Nunat Aqqinik Aalajangiisartut Oqaasiliortunut naleqqiullugu piginnaatitaaffii annikillineqarput. Tamanna Oqaasiliortut pillugit Inatsisartut inatsisissaattut siunnersuummut – aammattaaq ataatsimiinnermi matumani saqqummiunneqartumut - atatillugu isiginiarneqassaaq. Siunnersuummi Oqaasiliortut erseqqissumik piginnaatinneqarput pisortatigoortumik kalaallisut allattaatsimik aalajangersaanissamut. Taamaammat nunat aqqisa pisortatigoortumik kalaallisut allattaaseq aallaavittut maleruassavaat, assigiissaarinissap qularnaarnissaa siunertaralugu. Taamaattoq

sanioqqussisinnaaneq siunnersuutigineqarpoq, Oqaasiliortut akuersereernerisa kingorna, pisortatigoortumik allattaatsip sanioqqunnissaanut Nunat Aqqinik Aalajangiisartut periarfissillugit.

Aammattaaq nutaartaavoq nunat aqqisa nutaat atuuttussatut akuerinissaannut tunngavissani, kommunalbestyrelsimit oqaaseqaateqartitseqqaarnissaq ilaajunnaarmat. Taamatut allannguinermut tunuliaqutaavoq, nunat aqqi nutaat amerlangaarmata, taamaaliornissaq allaffissornikkut annertuumik nammatassiissamat. Aammattaaq oqaaseqaateqartitseqqaarnissamik pisariaqartitsineq annertuumik annikillisussatut ilimagineqarpoq, Nunat Aqqinik Aalajangiisartut nunat aqqisa akuerisaanissaannut tamanullu saqqummiunnissaannut tunngavissat aalajangersartalertussaammatigit. Taamaattoq Nunat Aqqinik Aalajangiisartut siunertamut naapertuuttutut isigigunikku, kommunalbestyrelsimit oqaaseqaateqartitsinissamat suli periarfissaqarput.

Nutaaliornertut pingaarutilittut kingulliullugu eqqaajumavara, Nunat Aqqinik Aalajangiisartut ataatsimut isigalugit ilaasortallu ataasiakkaat piginnaasaqarnissaannik piumasaaqat ilanngunneqarmat, aamma piumasarineqarmat ilaasortat Naalakkersuisunit toqqarneqartassasut, suliffeqarfiit kattuffiillu siunnersuummi taaneqartut inassuteqareernerisigut.

Taamatut oqaaseqarlunga siunnersuut inussiarnersumik Inatsisartunut oqallisigisassanngortippara.